

Heefches Kerb 1994

Uff'm Heefche is Kerb un die werd gefeiert
un wenn sich an so me Daa mancher aa eiert,
weil ned ganz so gemiedlich wie im warme Bett,
isses, we man vun sich heerd in de Kerweredd.
Viel gebbds net se vezeele, es Heefche is halt kleen,
awwa was so basseerd, das is als aarisch scheen,
deswä sollt ma so e paar Geschichte vezeele,
aa wemma dodorsch e paar Heefches quäle.

Faschd jeder bei uns geht geere in e Verein,
awwa die Haarau gebs nimmie, FEKD is geheim,
die Ini hat kenn Vorstand, also gebbs aa kenn Poschde
bleiwe die Sparer, awwa die losse sich nix koschde.
Fa die Kerb dassjoor han die e ganz neijie Idee,
veleje de Stammdisch uffs Dorfplatz med Bier, Wein un Tee,
warom werd so manchem schlachardisch klar:
Beim Spare han die sich sogar es Frieda gespart!

Do unne hamme enna, denne siesche ned oft,
awwa heere dosche denne, oft unvehofft,
beispielsweis naachts, wenn Leibbrocks schun schloofe
kommt der vun de Arwed - un denkt ned ans Poofe.
Die Musik so laut, daß de Lautsprecher knallt
em Böhler sei Audoradio plärrt bis ins All.
So gehts doch beim beschde Willi ned weider,
sunschd koschts die Geheergäng do neue vum Schneider.

Awwa das wär ned 's schlimmschde, e viel größer Vebreche,
is, wenn de Böhler sunndaas de Mäher dod dresche,
hadd der e Maschin, schun werd der laut,
es werd Zeit, daß enner dem mo de Motor klaut.
Weil: dem sei Läwe is ned emol e Pifferling mee wert,
wenn denne Balawa de wild Maier mo heerd.
Der däd 's liebschd wäm Krach schun de Dorfplatz ausmischde,
weg med denne rotznasische Dorfplatzterrorischde.

Wenna anfängt demed, bleibt der ned lang alleen,
zusamme mischde, do werds doch erschd scheen,
dem helft aa die Ortsrädick -- äh -- din, fröhlich beschwingt,
Mörsche Renate, wann's die Mischdgawwel schwingt.
Die Kinna misse fort, die geheere ingesperrt,
weil alles no Ruh un no Ordnung plärrt,
dann kann de Maier rase med seim schnelle Karre
om die Eck vun seim Dorfplatz med zwähunnert Sache.

Hoffentlich gehts em dann ned wie dem arme Baam
im Unnerdorf links, vorm Hombi seiner Farm,
do hadd enna, wie er saad, midde in de Naacht
das scheene Beemsche med me Audo niedergemacht.
Es hadd kenna gesiehn, es hadd kenna geheerd,
awwa so isses, wenn uff'm Heefche e grienes Ding steert,
ruck zuck iss es weg, fort med dem Holzgestänge,
dann bleibt wenischdens naachts kenna mee heemzus dran hänge.

Eens hamma, das fad Fahrrad, ned schnell awwa scheen,
wenns beim Frieda lang sitzt, dann loßtses aa mol stehn,
‘s iss besser, wamma sich dann zu Fuß heem steht,
schun grad in de Naacht, wenns Gleichgewicht fehlt,
schlimm isses dann, wemma selbscht schun ganz waggelisch,
uff eemo die Wirtin sieht, aa schun ganz gaagelisch,
un sich dann beim Vesuch, es Frieda noch uffsefange,
de Knause uffschlaad wie bei me handfescht Gerangel.
Das dot ganz scheen weh un gebbd e Riesegezeter,
Mensch Margot, das ware nor vier Bier un e Malteser!

Un noch ens hamma, wo iwwers Heefche diest,
ohne Audo, hat nie Zeit, vum Wind werds gekisst,
sieht aus wie wann e Schiff die Seschel ausfahrt,
awwa’s iss nor es Gertrud im Rock uff’ m Rad.

Es beschd wers geween, wenns aa am ledschde April
no Limbach gefaa wär, do wär ich jedzd still,
awwa so isses domols deheemgeblieb
und zack! war die gut Fraa e ganz beeser Dieb,
had beim Nochbar denne weiße Kaschde geklaut,
no vorne geschläft, dem vor die Hausdeer gebaud,
awwa das Ding is gewannert un naachts hats geknalld,
do iss der ald Kielschrank vum Delefonshesje gefall.
Es Gertrud hod de Ärjer, ‘s war werklich ganz krank,
sei Nochbar, der freit sich, der kried e neier Schrank.

In der Naacht ware aa die Griene plötzlich do,
ned die vun de Pardei, die aus dem grienweiße Zoo,
die han bei uns no de beese Kinna geguggd,
awwa uff emol hadd denne eer Audo gemuggd,
die Kinna hannse angeschob, als Bersch enuff,
alles umsunschd, fa nix han se geschuffd,
eemo guter Wille, awwa's hat nix genitzt,
heemzus han die Griene hinnerm Abschleppwaan gesitzt.

Un well ma allegaa so anstännische Kinna hann,
hamma e Feschdsche gemachd, für Kind, Fraa un Mann.
Bei Wolfe im Gaade hamma uns deswä gedroff,
das Feschd fa die Kinna iss seerscht gut geloff,
awwa ned nors es Feschd, aa Bier un Bacardi,
fa e mancher war das es Aus uff der Party.
Dem eene wolld uff emo alles widda owwe raus,
rennt de Gaade enunna, der kennd sich dort aus,
Awwa umweltbewußt hadda es Recycling ertrotzt,
un hat das gut Zeich uff de Komposchd gekodzd.

Das anner iss omgefall, glatt aus'm Stand,
voll med Bacardi bis owwe an de Rand,
Wär's leie blieb, wär wahrscheinlich gar nix basseerd,
's hedd kenna gesiehn, 's hedd kenna geheerd.
Awwa dann hanse's uffgehob un ins Bett gebrung,
unnawegs iss'm dann gleich e Brechereche gelung.
Im Bad is das weidagang, dort hats sei Mann gefunn,
un so sell de seind endlich zum Budze gebrung.

Die annere han weiter gesung, gedantz un laut gelacht,
jess han die da in der Naachd all e Balawa gemacht,
irgendwemm war's se laut, der hat die Bolizei geruft,
awwa die han die Plärrhäls beim alt Rudig gesucht.

Dem gelt unser Dank, mer wisse das ehrlich se schätze,
sunschd däd uff'm Heefche med uns kenn Mensch mee schwätze.
Un das iss doch wichdisch, vor allem es Redsche,
ohne das gehts ned, das iss doch es Beschde,
do heerd ma vun Ennem der is es ganze Johr
im Audo vun Wertschaft zu Wertschaft gezoo.
Bissene geschnappt han, un jedzd muss er laafe,
awwa schun kommt Ecker, de Doggda, der Brave,
un saad, do muß halt e Initiative her
mer mache dem e Zebrastreife vor die Deer.

Die Initiative laaft, Unnerschrifte werre gesammelt,
unnerdes hat sich de Ecker hinner Buntsandsteen verrammelt,
in das Haus fließe seit Johre unendliche Gelder,
awwa je mee se dran mache, es werd vun auße immer älder.
„Vorwärts in die Vergangenheit“, ich glaab, das will der hann,
ei der stoppt uns noch de Vekehr, der gute Mann.
Awwa eens iss ganz klar, wenn mer dann all laafe,
kann der aa sei ganze Audos vekaafe.

Die FEKD, die sieht das ned gäre,
Konkurrenz im Ort, awwa ma will sich ned wehre.
Eigentlich wolld de Scherriff es Radar selwa baue

und dodemed de Raser die Penunze klaue.
In korzer Zeit wäre genuch Kohle do
un die Lärmschutzwand dodevun hochgezoo.
Vum Rescht hätte se Backsteen un Zement geklaut
un owwe Richtung Preußen e neijie Mauer gebaut.

Awwa vorher baue annere midde ins Dorf
nor hanse med de Gemeen noch e kleen bisje Zoff,
Es Elisabeth, es Gertrud, e Paff, e Architekt,
wenn die Beckersch Müll eweg han, sieht das aus wie gelect.
Nor werds dann schwierig mem Babier un mem Glas,
un die Bushaldestell hädde die aa vor de Nas,
awwa die Lösung macht es Heefche eigentlich noch scheener:
de Bus kried de Metz un de Maier die Container.

Jetzt stelle eich vor, wie das emol werd,
wenn do kemmee Raser un ken Laschtwaan dorchschnerrt,
owwenauszus die Mauer, es Heefche wär zu,
med dem Krach wär dann Zappe, mer hätte unser Ruh.
Awwa ehrlich, das wär bestimmt aa ned grad scheen,
dann iwwer e dodsterbensruisch Heefche se gehn,
e bißje Balawa un ab un zu Treiwe,
kann aa e Grund sin fa uff'm Heefche se bleiwe.
Sunschd wäre ma wahrscheins jedzd all schun im Bett,
un es gäb se läb Daa kemmee Kerb med sorer Red.